

FJALA E DEPUTETES EVIS KUSHI

E ENJTE 20 TETOR 2022

E nderuar Kryetare,

Të nderuar kolegë,

Në fakt, unë nuk do të flas për vete, siç bëre ti, sepse njerëzit këtu nuk janë për të dëgjuar për diplomat tona, por janë për të dëgjuar për sigurinë kibernetike. Në lidhje me argumentet, sepse dje the se nuk u ktheva përgjigje argumenteve, në fakt, ju bëni atë që bëni gjithmonë: vini këtu, recitoni pjesën tuaj, merrni çantën dhe ikni. Pra, ti nuk qëndrove që të dëgjoje përgjigjet. Mund t'i referohemi edhe videos, ku shihet se ju ikët dhe nuk pritët përgjigjet. Megjithatë, ju mirëkuptoj, sepse aty deklaruat se kishit fëmijën sëmure, dhe unë shpresoj të jetë mirë me shëndet. Kështu që është krejtësisht i justifikueshëm largimi juaj në këtë rast, por nuk mund të thoni që ju nuk dhashë përgjigje, sepse ju ikët dhe nuk i dëgjuat përgjigjet. Meqenëse disa nga argumentet nuk i dëgjuat dje, unë mund t'ju them sot.

Në lidhje me mbylljen e kopshtit, i referohesh nenit të gabuar, i referohesh nenit që lidhet me veprimtarinë. Këtë po të thosha edhe dje, që nuk jemi juristë as unë dhe as ju, sepse juristët e dinë shumë mirë se neni, të cilit duhet t'i referohemi në rastin e kopshtit, është neni 43 "Vlefshmëria e licencës". Pra, kur revokohet licenca një institucioni, në këtë rast kopshtit, i referohemi këtij neni dhe jo nenit të veprimtarisë. Pra, ai nen që ke thënë, nuk ka lidhje.

Në nenin 43 "Vlefshmëria e licencës" thuhet: "Çdo ndryshim i bërë nga ana e subjektit të licencuar duhet të miratohet nga ministri dhe Qendra Kombëtare e Licencimit. Në rast se ndryshimet e bëra kanë të bëjnë me kriteret e licencimit, licenca revokohet dhe kërkesa trajtohet si aplikim i ri". Pra, kjo ka ndodhur, ndryshimet që ka bërë kopshti lidhen me kriteret e licencimit dhe neni e thotë në mënyrë eksplicite: "Në rast se ndryshimet e bëra kanë të bëjnë me kriteret e licencimit licenca revokohet". Pra, ky është argumenti, mund t'u referoheni juristëve dhe ta kuptoni.

Ju përmendët edhe pedagogët, edhe protestën, në fakt, u hodhët nga një degë në tjetrën, se kam mbajtur shumë shënime, por vetëm për sigurinë kibernetike nuk folët. Folët për çështje të ndryshme...

Për sa u takon pedagogëve, ne jemi në dialog të vazhdueshëm me pedagogët. Përveç rritjes së pagave, po punojmë për të gjitha kërkesat. I respektoj të gjitha shqetësimet dhe kërkesat e tyre, madje edhe protestën, por halli i Partisë Demokratike dhe halli i Sali Berishës nuk është halli i pedagogëve. Pedagogët kanë halle të tjera dhe ne do të komunikojmë dhe do t'i trajtojmë që të gjitha, jo vetëm pagat, por të gjitha çështjet. Sidomos nga Partia Demokratike pedagogët nuk mund të presin asgjë, sepse ju i hapët ato universitete fantazmë, jeni ju ata që shisnit diploma false dhe ju sot dilni si mbrojtës të pedagogëve! Ju po mbron interesat e pedagogëve, ju që i shkatërruat universitet! Vetëm te ju nuk duhet të shpresojnë pedagogët. Pedagogët janë aq të mençur dhe e dinë shumë mirë këtë gjë. Shumë mirë që kërkojnë paga më të larta dhe gjithçka tjetër, por te ju nuk mund të shpresojnë, se ju nuk mund t'u ofroni asgjë, përkundrazi mund t'i shkatërroni më shumë.

Patjetër, shkollat janë shumë më mirë nga sa i latë ju, sepse sot i riparoni dhe nesër hidheshin para të tjera. Pra, asnjë nga rikonstrukcionet tuaja nuk ka qenë i qëndrueshëm, ndërkohë që investimet tona janë

shkolla më të mëdha, janë shkolla më të bukura, janë më të forta, janë më të sigurta, janë shkolla qendër komunitare, kështu që kemi bërë dhe do të bëjmë edhe më shumë edhe në qarkun tënd...

Ju si i kishit, zoti Gështenja, se po ankoheni?! Natyrisht, ne nuk i bëjmë dot të gjitha përnjëherë, sepse edhe sikur buxheti i shtetit të shkojë vetëm për rikonstrukcion...

Ndërkohë, kam një sugjerim për zonjën Zhupa; nuk po them këshillë, sepse nuk jam aq e vjetër, por jam pak më e vjetër se ajo për t'i dhënë një sugjerim. Shikoj një padurim të jashtëzakonshëm për karrierë. Ju do të bëni karrierë, e keni medaljen e artë, i keni edhe ca cilësi, por mos e sakrifikoni karrierën nga padurimi, zonja Zhupa, dhe mos e sakrifikoni edukatën nga padurimi për karrierë.